

ISLES DE MALDIVE




QVANT aux Isles de Maldive ou Maldiver, situées à l'opposite du riuage de Malabar, sont en nombre de plus de mille, à cause que la mer y fait tant de separations, & encores si estroites, que les mats des nauires, touchent des deux costez aux branches des arbres, & mesmes en d'aucuns endroicts vn disposauteux, saute aysément d'vn costé à l'autre, pourueu qu'il empoigne quelques branches en la main. Les habitans y sont necessiteux de beaucoup de choses, toutesfois ils sont bien pourueus de *Coquen*, qui sont certaines noix d'Inde & de Cayro, qui est la grosse de ces noix; & aussi le Chamure d'Inde dont on fait des cordes, cables, & autres choses, & y en a en si grande abondance, qu'on en fournit toutes les Indes & contrées Orientales. Ils font des bateaux du mesme bois à leur mode, avec tout ce qui en despend. Les voiles ils les font des feuilles, lesquelles ils cousent ensemble, avec le filet qu'ils en tirent sans y mettre ou employer aucun clou de fer, & viennent chargées de denrées du mesme arbre, & qui plus est, leurs viures & victuailles sont au mesme bateau, & tirées du mesme arbre. Somme les nauires avec la marchandise & choses necessaires sont tout tirées de cest arbre, & c'est le plus grand profit que ceux de Maldive tirent de leur Isle. La principale de toutes ces Isles est Maldive, là est le Palais Royal, & toutes les autres sont nommées apres ceste là, il y a aussi vne ville marchande. Qui en voudra sçauoir d'auantage de ces Isles, qu'il lise l'historien Maffee.

Noix d'Inde



MALABAR.



DE PUIS le cap de Comorin, le pays de Malabar commence son origine iusques à la riuere & ville de Cangeracon, il comprend du costé de la mer bien 300. miles en sa longueur, depuis le mont Gates iusques à l'Ocean 50. lieues, ce pays est mieux peuplé & cultiué, qu'aucune autre contrée des Indes. L'air y est fort bon & bien temperé, la terre y est fertile, arrousee de plusieurs riuieres & ruisseaux. Et combien qu'il n'y ait pas beaucoup de bled, si est-ce toutesfois qu'il y a beaucoup de ris, d'orge & autres fruiets, comme aussi du gingembre, des mirabolans, de la canelle, & du poiure, &c. Il y a des grandes eaux mortes, pleines de grandes Lezardes, presque semblables aux Cocodrilles, ont la peau dure & couuverte d'escailles, les habitans les mangent, & se seruent aussi à table comme d'vne viande fort delicate, & aussi d'vne certaine sorte de chauuesouris, lesquelles ont les dens & le museau comme vn renard, & sont grandes comme des escouffes, il y a

Estrange
manger.